

АКАФИСТ ЖИВОНОСНОМУ ГРОБУ И ВОСКРЕСЕНИЮ ГОСПОДНЮ

Кондак 1

Возбранному Воеводе, разрушителю смерти и ада, победную песнь Тебе, Всецарю Христе, приносим, яко востал еси, Всесильне, со славою тридневен от гроба и вся умершья от века совоскресил еси: мы же страданием Твоим вечныя тли избавльшися, к самому месту погребения Твоего с веселием и радостию зовем: Радуйся, живоносный гробе, из негоже Христос воскрес!

Икос 1

Ангел предстатель с небесе низшед, камень от гроба Твоего отвали, Христе Боже, и мироносицам благовести востание Твое, глаголя: шедше, рцыте учеником Его, яко воста от мертвых: они же, вразумленные чудным явлением, зряще ко гробу Твоему, с верою и любовию возглашаху: Радуйся, живоносный гробе, в немже Христос, яко человек, почи, и яко Бог, воскрес тридневен! Радуйся, яко из тебе Спас мира, яко Жених из чертога изшед, смерть попра и ада пленил есть! Радуйся, яко востанием Того, от века умерший, в жизнь нестарее-мую воста! Радуйся, яко в тебе Христу возлегшу, проклятая в делах человека земля освятится! Радуйся, яко тобою перевозданный Адам паки в ризу бессмертия облакается! Радуйся, яко в тебе образ всемирнаго воскресения начертывается! Радуйся, живоносный гробе, из негоже Христос воскрес!

Кондак 2

Яко прииде на гроб Мариа Магдалина и другая Мариа помазати Тело Твое, Христе Боже, обретоша Ангела на камени сидяща, и глаголюща к ним: не бойтеся! Вем бо, яко Иисуса распятаго ищите: несть zde, но воста, якоже рече вам. Сия убо слышавше святыя жены, текше вспять, благовестиша учеником о востании Твоем, да вси, яко Творцу и воскресшему Владыце Ангельское пение воспоют, глаголюще: Аллилуиа!

Икос 2

Бурю внутрь имеяху сумнительных помышлений ученицы Твои, Христе, в час смерти Твоея, не ведуще Писания, яко подобает Тебе из мертвых воскреснути: темже Петр, весть прием о востании Твоем, тече ко гробу, хотя видети бывшее: приник же и виде едину ризу Твою в нем лежаща, с верою возгласи: Радуйся, живоносный гробе, яко в тебе, посреде земли, всемирное

спасение содеяся! Радуйся, яко Царю царей одр, и Владыке владык покоище был еси! Радуйся, яко тобою беззаконное сонмище иудейское всеконечне посрамися! Радуйся, яко пред тобою ересь саддукеев, глаголющих не быти воскресению, низло-жися! Радуйся, гробе, паче храма Соломонова честнейший! Радуйся, паче скинии свидения и ковчега завета святейший! Радуйся, живоносный гробе, из негоже Христос воскресе!

Кондак 3

Слышавше, иже от кустодии, суетнии стражи гроба Твоего, Христе, трус велий бывший, и камень отвален и гроб празден видяще, от страха быша яко мертвы, и текше во град, возвещаху архиереем и старцем вся бывшая: они же, пребеззаконнии, аще и умыслиша утаити велие чудо, но не возмогоша сокрыти истины, ниже воспятити верующым нети Тебе: Аллилуиа!

Икос 3

Иже иногда страха ради иудейска потаен сый ученик Твой, Христе, Иосиф, иже от Аримафеа, испроси у Пилата Божественное Тело Твое и с Никодимом, смешением смирны и алая помазав е и плащаницею чистою обвив, во гробе нове положи, в немже никтоже от человек погребен бысть, токмо Ты един, да освятиши земное естество: увидев же по сих Твое из мертвых воскресение, пришед ко гробу Твоему, со умилением возгласи: Радуйся, живоносный гробе, не кустодиею, паче же Архангелами и Ангелами стрегомый! Радуйся, яко от тебе Христос со славою изшед, безумныя стражи Пилатовы недоумением и ужасом порази! Радуйся, яко печатей гробных не вредив, богопротивнаго Каиафу посрами! Радуйся, яко из тебе воскресшу Христу, светлый день всемирнаго Боговедения наста! Радуйся, яко тобою идолы и кумиры по всем концем земли сокрушатся! Радуйся, яко на тебе храмы Бога истиннаго по всей вселенней утвердятся! Радуйся, живоносный гробе, из негоже Христос воскресе!

Кондак 4

Воспоминающе ученицы Твои пресладкое обетование, еже, грядый на вольную страсть, провещал еси пред ними, варяти их по воскресении в Галилеи, поспешшеся идоша в Галилею, в гору, аможе повелел еси, и видевше Тя тамо, Егоже прежде обыкоша зрети, истинна человека, не привидением, но самую вещью плоть нашу носяща, с верою и любовию, яко Богу поклонившася, зовуще: Аллилуиа!

Икос 4

Разум неуразуменный был еси иудеом, неразумевшим пророческих о Тебе сказаний, ниже искавшим познати истину воскресения Твоего, како печати не рушив, из гроба изшел еси: темже безумие науцаху кустодию воз-

вестити людем, Пречистое Тело Твое украдено быти: мы же преславному воскресению Твоему дивящися, похвальная живоносному гробу Твоему воспитуем, глаголюще: Радуйся, всебогатый гробе, яко имел еси в тебе всем жизнь Подающего! Радуйся, яко оскверненная беззакониями человеческими земля пречистою Плотию Христовою, в тебе, возлежавшею, освящается! Радуйся, яко Воскресший из тебе прия всяку власть на небеси и на земли, да всех и вся к Богу Отцу приведет! Радуйся, яко камению от тебе Ангелом отвалену бывшу, святые жены мироносицы уразумеша Христово воскресение! Радуйся, яко Спасу мира из тебе воставшу, во всю землю изыде апостольское вещание! Радуйся, в немже благодать воскресшаго Жизнодавца до днесь невидимо почитет! Радуйся, живоносный гробе, из негоже Христос воскрес!

Кондак 5

По днех осмих от востания Твоего, Господи, пришел еси ко учеником Твоим, дверем заключенным, дарование Святаго Духа подавая им: тогда убо и Фоме рекл еси: прииди, осяжи язвы Моя, и не буди неверен, но верен: темже познав Тебе истинно воскресша быти, с прочими ученики радостне возопи: Аллилуиа!

Икос 5

Ветия суемудренныя, книжники иудейстии, якоже рыбы безгласныя видим, недоумеющыя глаголати о преславном востании Твоем, Христе, и неразумеющыя, яко подобаше Тебе пострадати за род человек и из мертвых воскреснути: мы же, совоскресшии Тебе верою и любовию, с веселием самому гробу Твоему зовем: Радуйся, живоносный гробе, яко тобою жизнь вечная всем концем земли позная! Радуйся, яко в тебе смертью Начальника жизни смерти жало и держава сокрушися! Радуйся, яко от севера и моря к тебе приходяще, воскресшаго Жизнодавца прославляют! Радуйся, яко от запада и востока текуще, вси в тебе залог бессмертия обретают! Радуйся, яко по образу Твоему все гробы издадут своих мертвецов в день последний! Радуйся, веры христианския утверждение и пророческих сказаний печате! Радуйся, живоносный гробе, из негоже Христос воскрес!

Кондак 6

Егда по воскресении Твоем, Христе, явился еси учеником Твоим на мори Тивериадстем, повелевая вовежди мрежу одесную корабля: тогда возлюбленный ученик Твой, познав Тя от ловитвы рыб, Петрови глаголаше: Господь есть! Изшедше убо на землю, обретоша огонь и рыбу лежащу и хлеб, от нихже вкусивше и познавше в Тебе своего Учителя и Господа, единими усты и единым сердцем возопиша: Аллилуиа!

Икос 6

Утру сущу глубоко, жены приидоша на гроб Твой, Иисусе, но желаемаго Тела Твоего не обретше, недоумением и печалию одержими бяху: Ты же, Утешителю скорбящих, явлься им посреди вертограда, единым гласом: Марие! плач их на радость преложил еси: темже познавше воскресение Твое, с веселием восклицаху: Радуйся, живоносный гробе, в немже Христу всельшуся, адова оскудеша царствия! Радуйся, яко тебе от первосвященников запечатлену бывшу, владыка сени смертныя с трепетом издаде узники, яже от века содержал ест! Радуйся, яко в трусе, при востании из тебе со славою Искупителя человеков, вся тварь обрете вечное успокоение! Радуйся, яко в тебе образ всемирнаго воскресения Боголепно предъизобразися! Радуйся, яко тобою лик апостольский в вере и любви утвердися! Радуйся, и ты, Иосифе, толикое сокровище в твоём вертограде стяжавый! Радуйся, живоносный гробе, из негоже Христос воскресе!

Кондак 7

В страдании Твоем, Христе, не терпя солнце беззаконных неистовства, свет свой скры, и завеса церковная раздрася: в живоносном же гробе Тебе положену бывшу, земля потрясися, аки хотя поглотити законопреступных: но Ты, яко Бог, воскрес еси со славою, и всероднаго Адама воздвигл еси с Тобою: темже достойно и праведно воскресению Твоему зовем: Аллилуиа!

Икос 7

По преславном востании Твоем, Христе, Лупе и Клеопе явился еси, яко странник, на пути в Еммаус, и беседующим им о приключшихся в Иерусалиме, зазираем был еси от них, яко един неведый бывшаго: Ты же, яко Всеведущий, пророчества открыв и неверствие их обличив, познался еси има в преломлении хлеба: темже убо с радостию великою возвратившися во Иерусалим, и узревше вертоград Иосифов, возгласиша: Радуйся, живоносный гробе, из негоже, яко Иона из чрева китова, Христос тридневен произыде! Радуйся, яко последнее виталище был еси Тому, Иже на земли не име где главу подклонити! Радуйся, яко тобою положися предел вольному уничижению нас ради Спасителя мира! Радуйся, яко в тебе предначася торжество Победителя ада и смерти! Радуйся, яко не ктому могут законопреступнии оклеветати лежею востание из гроба Сына человеческого! Радуйся, яко тобою небо и земля и преисподняя обре-тоша радость! Радуйся, живоносный гробе, из негоже Христос воскресе!

Кондак 8

Все естество Ангельское и человеческое удивися великому Твоему, еже о нас, смотрению: неприступнаго бо, яко Бога, зряще всем приступив человека, зрак раба приемша, распята же и погребенна, но воскресша в третий день

во славе и вознесшася с плотию на небо, тем убо яко Спасителю и Владыце воспеваем: Аллилуиа!

Икос 8

Новое и преславное чудо показал еси воскресением Твоим, Христе Боже наш, печати гроба не вредив, якоже и Девы в рождестве Твоем: темже почитаем вольная страдания Твоя, славословим Крест и погребение, и преславному воскресению Твоему покланяющася, к живоносному гробу Твоему с веселием зовем: Радуйся, всесвятый гробе, из негоже Христос, якоже прорече, воскресе и Собою весь мир обнови! Радуйся, от негоже всезлобный враг рода человеческого лютейший удар во главу прия! Радуйся, яко от тебе отваленный камень адова врата сокруши и верей железныя сотре! Радуйся, яко из тебе всемирное Солнце правды возсия и мглу неверия разгна! Радуйся, яко в тебе Христу возлегшу, вся концы земли вони безсмертия исполнишася! Радуйся, яко тебе открывшуся, источник нашего тления заключися! Радуйся, живоносный гробе, из негоже Христос воскресе!

Кондак 9

Проповедницы востания Твоего, богоноснии апостоли, послани бывше, от конец до конец земли проповедаша Тебе истиннаго Бога, идолы сокрушиша, беззаконные обычаи языческие попраша, храмы и жертвенники Богу истинну воздвигаша, и всех верных научиша воспевати Тебе: Аллилуиа!

Икос 9

По востании Твоем из гроба, дверем заключенным, ко учеником Твоим вшел еси, и вкуш от хлеба и сота, сладость церковная, не привидение пред ними, но истиннаго их Учителя и Господа быти уверил еси: темже свободящася от недоумения и страха, с радостию неизреченною посещаху место погребения Твоего, глаголюще: Радуйся, живоносный гробе, в немже Бог Слово, плотию уснув, свя-щеннотайне тридневнова! Радуйся, яко Тойже востанием Своим вся от века уснувшая возбудил есть! Радуйся, яко в тебе Солнцу правды, Христу, зашедшу, сущым во аде и сени смертней Свет жизни возсия! Радуйся, яко из тебе Произшедый, воскресение и живот вечный всем дарова! Радуйся, яко Ангелу о тебе благовествующу, плач и рыдание Адамово преста! Радуйся, яко камению от тебе отпадшу, каменносердечнии языцы навькнут веровати в жизнь вечную! Радуйся, живоносный гробе, из негоже Христос воскресе!

Кондак 10

Земля убояся и умолче, Тебе, Творца своего, зрящи во гробе мале положена: ад, вострепетав от неприступныя славы воскресения Твоего, издаяше мертвыя, от века содержимыя, небеса же восход ко Отцу готовяху, Егоже ни-

колиже отлучался еси: темже и мы, искупленнии Крестом Твоим, вси Тебе зовем: Аллилуиа!

Икос 10

Мариа Магдалина, яко теплейшая к Тебе, Христу Богу, верою, зело рано пришедши на гроб Твой, сподобися узрети Тя, Жизнодавца, и желаше облобызати пречистыя нозе Твои: но Ты убо, яко Владыка всяческих, не прикасайся Мне, рекл еси: не убо взыдох ко Отцу Моему, иди же к братии Моей и рцы им о востании Моем: темже, яко благовестие носящая, небо и землю оглашаше, вопиюще: Радуйся, живоносный гробе, в немже Христос Пречистою Плотию, усну и почи яко лев, никимже возбудимый! Радуйся, из негоже яко Бог, самовластие воста, ничимже удержимый! Радуйся, яко о бывшем в тебе ад неволею истинствует глаголя: уне мне бяше, аще бы от Марии Рождшагося не приял! Радуйся, яко тобою посрамлен, князь тьмы рыдает! Радуйся, яко тобою обрадован, лик Ангельский торжествует! Радуйся, новыя благодати хранилище и непрестающих чудес источниче! Радуйся, живоносный гробе, из негоже Христос воскресе!

Кондак 11

Представ, по воскресении, учеником Твоим, Христе Боже, мир Твой подал еси им и власть отпущати грехи, да проповедуют востание Твое от гроба, крестяще во имя Отца и Сына и Святаго Духа: они же изшедше, яко облеченные силою свыше, научиша вся языки воспевати Тебе, яко Богу: Аллилуиа!

Икос 11

По востании Твоем из мертвых, являя Себе учеником Твоим, Христе, Симоне Ионин, любиши ли Мя: рекл еси Петру, и по трикратном любве его к Тебе извещении, Церкви Твоей паки того учителя и апостола даровал еси: мы же, проповедию его наученнии, поклоняющесе живоносному гробу Твоему, тако глаголем: Радуйся, всесвятый гробе, в немже, яко в ковчезе Ноеве, от разлиания греховнаго и тли смертныя весь род человеческий спасесе! Радуйся, из негоже, яко из святаго святых, мир и благословение всем падшым сынам Адама изнесесе! Радуйся, любве Христовы к нам, во днех плоти Его, последний краю и пределе! Радуйся, и нас всех братию нашу по плоти до смерти и гроба любити научивый! Радуйся, мрак и страхи сени смертныя для верующих разгнавый! Радуйся, странником земли путь жизни вечный в небесный Иерусалим указавый! Радуйся, живоносный гробе, из негоже Христос воскресе!

Кондак 12

Божественное, еже о нас, смотрение Твое славяще, страсти Твоя почитаем, предивному воскресению Твоему поклоняемся, и от земли к Небесному

Родителю преславное вознесение воспевает и молимся: Пресвятаго Твоего Духа не отыми от нас, да вси зовем Тебе во веки: Аллилуиа!

Икос 12

На гору Елеонскую егда возшел еси, Отчее сияние, тогда пресветлый облак подъят Тя, зрящим учеником Твоим, и Ангели апостолом глаголаху: мужие Галилейстии, что стоите зряще на небо; се бо, Егоже видите возносящаяся, Той паки приидет с плотию: они же с радостию возвратившися во Иерусалим, хваляху Тебе, истиннаго Бога, и живоносному гробу Твоему, в немже тридневно положен был еси, с веселием возглашаху: Радуйся, живоносный гробе, собывшимся в тебе всех нас в вере во Христа утвердивый! Радуйся, пред мучители и враги истины, надеждою воскресения непобедимы нас сотворивый! Радуйся, в немже священнотайне, в купели крещения, вси верующие Христу спогребаются! Радуйся, из негоже крещении, умерши греху, к новой жизни со Христом совостают! Радуйся, яко пред тобою от благодати воскресения, в тебе почиющей, вся крепость ада исчезает! Радуйся, яко из тебе, от полноты силы Божией, на тебе явльшейся, заря жизни вечныя незаходимо сияет! Радуйся, живоносный гробе, из негоже Христос воскрес!

Кондак 13

О пресвятый и живоносный гробе Христов, утешение рода человеческого и всея земли украшение, тебе, яко чертогу Царя Славы, мысленне с верою предстояще, молимся к тридневно воскресшему из тебе Христу Богу нашему, во еже избавитися нам от враг видимых и невидимых, от бед временных и вечных, паче же от страстей и грехов наших, да, совоскресше Ему покаянием, в обновлении правыя жизни ходити начнем, благодарне зовуще: Аллилуиа!

(Этот икос читается трижды, затем икос1 и кондак 1)